

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**Zaključak**

**o odbacivanju Prijave koncentracije privrednih subjekata „BIMAL“ d.d. Brčko distrikt i „ERAKOVIĆ“ d.o.o. Bečej**

**Sarajevo**  
**juli, 2021. godine**



Broj: UP-01-26-1-016-5/21  
Sarajevo, 14.07.2021. godine

Konkurencijsko vijeće Bosne i Hercegovine, na osnovu člana 25. stav (1) tačka e), člana 42. stav (2), a u vezi s čl. 12., 14. i 16. Zakona o konkurenciji («Službeni glasnik BiH», br. 48/05, 76/07 i 80/09), rješavajući po Prijavi koncentracije privrednog subjekta „BIMAL“ d.d. Brčko distrikt, Bijeljinska 9, Brčko distrikt, Bosna i Hercegovina zaprimljenoj pod brojem: UP-01-26-1-016-5/21 dana 12.05.2021. godine, na 90. (devedesetoj) sjednici održanoj dana 14.07.2021. godine, je donijelo

### **ZAKLJUČAK**

1. Odbacuje se Prijava koncentracije privrednog subjekata „BIMAL“ d.d. Brčko distrikt, Bijeljinska 9, Brčko distrikt, Bosna i Hercegovina, kojom isti namjerava steći kontrolu nad privrednim subjektom „ERAKOVIĆ“ d.o.o. Bečej Novosadska 163, Bečej, Republika Srbija, radi nepostojanja obaveze prijave koncentracije, u smislu člana 14. stav (1) Zakona o konkurenciji.
2. Podnosilac prijave je na ovaj Zaključak dužan platiti administrativnu taksu u iznosu od 1.000,00 KM, u korist Budžeta institucija Bosne i Hercegovine.
3. Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Konkurencijsko vijeće je dana 12.05.2021. godine, pod brojem: UP-01-26-1-016-1/21, zaprimilo Prijavu koncentracije (u daljem tekstu: Prijava) privrednog subjekta „BIMAL“ d.d. Brčko distrikt, Bijeljinska 9, Brčko distrikt, Bosna i Hercegovina (u daljem tekstu: BIMAL ili Podnosilac prijave), kojom isti namjerava steći kontrolu nad privrednim subjektom „ERAKOVIĆ“ d.o.o. Bečej Novosadska 163, Bečej, Republika Srbija (u daljem tekstu: ERAKOVIĆ), u skladu sa članom 12. stav (1), tačka b) pod (2) Zakona o konkurenciji ("Službeni glasnik BiH", br. 48/05, 76/07 i 80/09) (u daljem tekstu: Zakon).

Podnosilac je dana 18.06.2021. godine podneskom broj UP-01-26-1-016-2/21 samoinicijativno dopunio Prijavu dostavljajući Rješenje Komisije za zaštitu konkurencije Republike Srbije.

Podnosilac Prijave je, u smislu člana 30. stav (2) Zakona, naveo da namjerava podnijeti zahtjev za ocjenu koncentracije ovlaštenim tijelima Republike Srbije, Republike Crne Gore, Republike Sjeverne Makedonije, Republike Albanije i Kosova.

Nakon kompletiranja dokumentacije, utvrđeno je da je Prijava podnesena, u smislu člana 16. stav (2) Zakona (namjeravana koncentracija s pravnim osnovom: Memorandum o razumjevanju) i da je ista potpuna u smislu člana 30. Zakona.

Konkurencijsko vijeće je iz Prijave utvrdilo slijedeće činjenice:

## 1. Učesnici koncentracije

Učesnici koncentracije su privredni subjekt „BIMAL“ d.d. Brčko distrikt, Bijeljinska 9, Brčko distrikt, Bosna i Hercegovina i privredni subjekt „ERAKOVIĆ“ d.o.o. Bečej Novosadska 163, Bečej, Republika Srbija.

### 1.1. Privredni subjekt BIMAL (Podnosilac prijave)

Privredni subjekt „BIMAL“ d.d. Brčko distrikt prema aktuelnom izvodu iz sudskog registra registrovan je kod Osnovnog suda Brčko distrikta pod brojem MBS: 1-323, sa upisanim osnovnim kapitalom u iznosu od 20.720.130,00 KM, i pod zajedničkom kontrolom je društava iz Austrije: Seed Oil Holdings GmbH i STUDEN & CO HOLDING sa sjedištem u Beču. Austrija.

Pretežna registrovana djelatnost privrednog subjekta BIMAL je proizvodnja ulja i masti.

Povezani privredni subjekti Podnosioca zahtjeva u Bosni i Hercegovini su:

- STUDEN – AGRANA d.o.o. Brčko, Sjedište: Ul. Industrijska 4, Brčko distrikt BiH; Opis predmeta poslovanja: Proizvodnja šećera 10.81 Matični broj: 1-1735
- EKOPAK d.o.o. Sjedište: Ul. Zmaja od Bosne 7-7a, Objekat 03, Sarajevo-Novo Sarajevo BiH; Opis predmeta poslovanja: Djelatnosti sanacije okoliša te ostale usluge upravljanja otpadom 39.00 Matični broj: 65-01-0397-11
- „BELISAR“ d.o.o. Brčko Sjedište: Ul. Industrijska 3, Brčko distrikt BiH; Opis predmeta poslovanja: Ostale pomoćne djelatnosti u prevozu 52.29, Matični broj: 1-1997
- „AGRAGOLD“ d.o.o. Brčko distrikt BiH, Sjedište: Ul. Industrijska 4, Brčko distrikt BiH; Opis predmeta poslovanja: Trgovina na veliko mlijekom, mliječnim proizvodima, jajima, jestivim uljima i mastima 46.33, Matični broj: 1-542
- “STUDEN GLOBAL SEE d.o.o. Brčko, Sjedište: Ul. Industrijska 3, Brčko distrikt BiH; Opis predmeta poslovanja: Savjetovanje u vezi sa poslovanjem i ostalim upravljanjem 70.22, Matični broj: 1-1998
- „MINGOS - COFFEE“ d.o.o. Brčko, Sjedište: Ul. Industrijska 3, Brčko distrikt BiH; Opis predmeta poslovanja: Prerada čaja i kafe 10.83, Matični broj: 96-01-0059-13
- D.D. „ŽITOPROMET“ Brčko; Sjedište: Ul. Industrijska 3, Brčko distrikt BiH; Opis predmeta poslovanja: Iznajmljivanje i upravljanje vlastitim nekretninama ili nekretninama uzetim u zakup (leasing) 68.20, Matični broj: 1-975
- „INSTITUT ZA RAZVOJ I UNAPREĐENJE POLJOPRIVREDE“ d.o.o. Brčko distrikt BiH, Sjedište: Ul. Industrijska 3, Brčko distrikt BiH; Opis predmeta poslovanja: Posredovanje u trgovini poljoprivrednim sirovinama, živim životinjama, tekstilnim sirovinama i poluproizvodima 46.11, Matični broj: 96-01-0036-16
- „NAVITERRA” d.o.o. Brčko distrikt BiH, Sjedište: Ul. Industrijska 3, Brčko distrikt BiH; Opis predmeta poslovanja: Uzgoj bobičastog, orašastog i ostalog voća 01.25, Matični broj: 96-01-0033-18
- „ARION” d.o.o. Brčko distrikt BiH, Sjedište: Ul. Industrijska 3, Brčko distrikt BiH; Opis predmeta poslovanja: Cestovni prijevoz robe 49.41; Matični broj: 96-01-0055-19

### 1.2. Privredni subjekt ERAKOVIĆ

Privredni subjekt „ERAKOVIĆ“ d.o.o. Bečej registrovan je na adresi Novosadska 163 Bečej, Republika Srbija pod matičnim brojem 08677921 i nalazi se u vlasništvu fizičkih lica Aleksandre Eraković (50%) i Veselina Erakovića (50%).

Pretežna registrovana djelatnost privrednog subjekta ERAKOVIĆ je proizvodnja gotove hrane za domaće životinje.

Privredni subjekt ERAKOVIĆ nema povezanih privrednih subjekata u Bosni i Hercegovini.

## **2. Pravni okvir ocjene koncentracije**

Konkurencijsko vijeće u postupku ocjene koncentracije primijenilo je odredbe Zakona, Odluke o utvrđivanju relevantnog tržišta («Službeni glasnik BiH», br. 18/06 i 34/10), te Odluke o načinu podnošenja prijave i kriterija za ocjenu koncentracija privrednih subjekata («Službeni glasnik BiH», broj 34/10).

## **3. Pravni osnov i oblik koncentracije**

Pravni osnov koncentracije je Memorandum o razumjevanju potpisan dana 29.04.2021. godine između učesnika koncentracije, kojim je iskazana poslovna namjera od strane privrednog subjekta BIMAL da izvrši sticanje (...) <sup>\*1</sup> udjela u budućem zavisnom društvu radnog naziva SPV (u daljem tekstu SPV ili Ciljno društvo), a da se od strane fizičkog lica Veselina Erakovića izvrši sticanje (...) <sup>\*</sup> udjela u budućem zavisnom društvu radnog naziva SPV.

SPV/Ciljno društvo će se prethodno osnovati od strane privrednog subjekta ERAKOVIĆ i u njegov osnovni kapital će se unijeti imovina fabrike za proizvodnju stočne hrane „Bečejka“ (...) <sup>\*</sup>. Ciljno društvo će biti registrovano za obavljanje djelatnosti 1091 – Proizvodnja gotove hrane za domaće životinje (prema Uredbi o klasifikaciji delatnosti Republike Srbije) na propisan način i pravovaljano, sve u skladu sa propisima Republike Srbije.

Nakon registracije sticanja udjela od strane privrednog subjekta BIMAL i fizičkog lica Veselina Erakovića u SPV u nadležnim registrima, usvojiće se novi Osnivački akt SPV čija će sadržina biti u skladu sa odredbama Memoranduma o razumjevanju.

Nakon osnivanja SPV/Ciljnog društva od strane privrednog subjekta ERAKOVIĆ, sticanja udjela u istom od strane privrednog subjekta BIMAL i fizičkog lica Veselina Erakovića i usvajanja novog Osnivačkog akta, kako je prethodno navedeno, strane namjeravaju da se SPV pripoji privrednom subjektu BIMAL Agri d.o.o. Bečej.

Nakon sprovedenog namjeravanog pripajanja, privredni subjekt BIMAL bi u BIMAL Agri d.o.o. imao vlasničko učešće od (...) <sup>\*</sup> dok bi fizičko lice Veselin Eraković imao vlasnički udio od (...) <sup>\*</sup> u BIMAL Agri d.o.o.

U skladu sa naprijed navedenim, a na osnovu člana 12. stav (1) tačka b) pod (2) Zakona, pravni oblik predmetne koncentracije je sticanje kontrole privrednog subjekta BIMAL nad privrednim subjektom ERAKOVIĆ.

## **4. Relevantno tržište učesnika koncentracije**

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

---

<sup>1</sup> Podaci predstavljaju poslovnu tajnu u smislu člana 38. Zakona o konkurenciji

Prema odredbi člana 4. Odluke o utvrđivanju relevantnog tržišta u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupan ili dio teritorija Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Polazeći od svojstava, namjene i ocijene predmetnog skupa proizvoda i usluga, odnosno od stvarne djelatnosti učesnika u koncentraciji, a naročito privrednog subjekta ERAKOVIĆ (osnivača budućeg SPV / Ciljnog društva) čija je stvarna djelatnost proizvodnja gotove hrane za domaće životinje (proizvodnja i veleprodaja stočne hrane), Podnosilac prijave je predložio da se za ocjenu predmetne koncentracije definiše relevantno tržište proizvoda: tržište proizvodnje i veleprodaje stočne hrane.

Privredni subjekt ERAKOVIĆ ima proizvodne pogone na relevantnom tržištu proizvodnje i veleprodaje stočne hrane na cijeloj teritoriji Republike Srbije, zbog čega Podnosilac prijave predlaže za relevantno geografsko tržište Republiku Srbiju.

Imajući u vidu navode Podnosioca prijave da je relevantno tržište predmetne koncentracije tržište veleprodaje stočne hrane na relevantnom geografskom tržištu Republike Srbije, uzevši u obzir da Ciljno društvo ne učestvuje na tržištu Bosne i Hercegovine, namjeravana koncentracija neće imati efekte na tržištu Bosne i Hercegovine, te s toga nije ni rađena analiza tržišta u Bosni i Hercegovini.

## 5. Obaveza prijave koncentracije

Obaveza prijave koncentracije postoji ukoliko su uspunjeni uslovi iz člana 14. stav 1) pod a) i b) Zakona, odnosno ako ukupni prihod svih učesnika koncentracije ostvaren podajom roba i /ili usluga na svjetskom tržištu iznosi 100.000.000,00 KM po završnom računu u godini koja je prethodila koncentraciji i da ukupni godišnji prihod svakog od najmanje dva privredna subjekta učesnika koncentracije ostvaren prodajom roba i /ili usluga na tržištu Bosne i Hercegovine iznosi najmanje 8.000.000,00 KM, ili ako je njihovo zajedničko tržišno učešće na relevantnom tržištu veće od 40%.

Ukupni godišnji prihodi privrednih subjekata učesnika koncentracije za 2020. godinu, kao godinu koja je prethodila koncentraciji, u skladu sa članom 14. Zakona su sljedeći:

Tabela br.1

<b>KM</b>	<b>BIMAL</b>	<b>ERAKOVIĆ</b>
<b>Svijet</b>	(..)*KM	(..)*KM
<b>Bosna i Hercegovina</b>	(..)*KM	-

Izvor: Podaci iz Prijave

Godišnji prihodi učesnika koncentracije predstavljaju ukupne prihode (bez poreza na dodanu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 9. tačka h) Odluke o načinu podnošenja prijave i kriterijima za ocjenu koncentracija privrednih subjekata

Prema podacima iz Tabele br.1, učesnici koncentracije privredni subjekti BIMAL i ERAKOVIĆ u 2020. godini nisu ostvarili ukupan godišnji prihod koji podliježe obavezi prijave koncentracije u skladu sa članom 14. stav (1) Zakona, s obzirom da ne ispunjavaju uslov o visini pojedinačnog prihoda svakog učesnika u koncentraciji ostvarenog na tržištu Bosne i Hercegovine, koji treba da iznosi najmanje

8.000.000,00 KM, s obzirom da privredni subjekt ERAKOVIĆ ne ostvaruje prihode na tržištu Bosne i Hercegovine.

Također, učesnici koncentracije nisu ispunili uslov iz člana 14. stav (1) tačka b) u pogledu tržišnog učešća, obzirom da Ciljno društvo ne obavlja svoju djelatnost na teritoriji Bosne i Hercegovine, odnosno nema tržišnog učešća na tržištu u Bosni i Hercegovini.

## **6. Ocjena prijave koncentracije**

Konkurencijsko vijeće je u postupku ocjene podnesene Prijave, kao i dostavljene dokumentacije, utvrdilo kako ne postoji obaveza prijave koncentracije u skladu sa članom 14. stav (1) Zakona.

Uzimajući u obzir navedeno Konkurencijsko vijeće je odlučilo kao u dispozitivu ovoga Zaključka.

## **7. Administrativna taksa**

Podnosilac prijave na ovaj Zaključak, u skladu sa članom 2. stav (1) tarifni broj 108. tačka c) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», br. 30/06 i 18/11) dužan je platiti administrativnu taksu u iznosu od 1.000,00 KM, u korist Budžeta institucija Bosne i Hercegovine.

## **8. Pouka o pravnom lijeku**

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Zaključka.

**Predsjednik**

**Dr. sc. Amir Karalić**

### **Dostaviti:**

- Podnosiocu zahtjeva
- u spis